



# Պարույր Սևակ

## Նամակ

Նա՞ է գրում ինձ,

Թե՞ ես եմ գրում իմ հարազատին,-

Ինքս էլ չգիտեմ.

«Արդյոք քեզ ե՞րբ եմ, ե՞րբ եմ տեսնելու...

Ձմե՛ր ու ամա՛ռ,

Աշո՛ւն ու գարո՛ւն...

Իսկ ո՞ր է տարվա մե՛ր եղանակը,

Այն հինգերորդը...»

Նա՞ է գրում ինձ,

Թե՞ ես եմ գրում իմ հարազատին,-

Ինքս էլ չգիտեմ.

«Դու նկատե՞լ ես. ձմեռ ժամանակ

Անհնարին է անցնել անտառի այն ծանոթ տեղով,

Որով անցել ես ամռան օրերին,

Քանի որ ցրտից սաստիկ կուչ գալով

Ու ձյան բեռան տակ ճկվելով խղճուկ՝

Ոստ ու ճյուղերը փակում են ճամփադ,

Իսկ մթնշաղին կամ աղջամուղջին՝

Ճանկում են դեմքըդ,

Աչքիդ սպառնում:

Ես քայլում էի աղջամուղջի մեջ

Ու քայլում էի նաև... մտացիր:  
Մտացի՞ր արդյոք, մտամփոփ արդյոք,-  
Մի՞ թե նույնը չէ:  
Ու ես հասկացա,  
Որ երբ հուզված ենք՝  
Մենք թաքցրնում ենք մեր խեղճ ձեռքերը,  
Երբ անվստահ ենք՝  
Մենք թաքցրնում ենք մեր խեղճ ոտքերը:  
Իսկ ե՞րբ են մարդիկ թաքցրնում դեմքը:  
Գուցե ամոթի՞ց  
(Ես չե՛մ ամաչում իմ սիրո համար):  
Գուցե կարոտի՞ց  
(Ես ուզում եմ քեզ տեսնել բա՛ց աչքով):  
Գուցե ճանկրոտող ճյուղերի՞ց այս չար,  
Գուցե այս ցրտի՞ց, որ ճկում է ինձ  
Եվ ստիպում է կույզ գալ խեղճորեն  
(Կույզ գալ եմ ուզում քո՛ թևերի տակ)»...  
Նա՞ է ավարտում, թե՞ ես նրա տեղ,-  
Ինքս էլ չգիտեմ.  
«Իմ այս հարցերին մի՛ պատասխանիր,  
Բայց պատասխանիր լուկ իմ մե՛կ հարցին.  
Գարունը անցավ՝  
ես քեզ չտեսա,  
Ամառը անցավ՝  
ես քեզ չտեսա,  
Աշունը անցավ՝  
չտեսա ես քեզ,  
Ձմեռն էլ կանցնի՝  
չեմ տեսնի ես քեզ:  
Իսկ ո՞ր է տարվա մե՛ր եղանակը,

Այն հինգերորդը... մի՞ թե չի գալու»...

01.II.1963թ.

Երևան